

Zwjazk serbskich šulow?

Serbske kubłanske koło so na praktiske kročele hotuje

Budyšin (SN/mb). Wutworjenje „zwjazka serbskich šulow“ je hlowna zhromadźizna Domowiny hižo 2019 w Chrósćicach jako zaměr wobzamknyła a 2021 w Slepom wobkrućiła. Iniciator namjeta běše dwójce Jan Nuk. Nětko budže so serbske kubłanske koło z přenimi praktiskimi kročelemi zaběrać.

Tute koło je nowa kubłanska referentka Domowiny, Katrin Suchec-Dźisławkowa, w léće 2021 založiła. Do njeho slušaja mjez druhim předsydku Serbskeho šulskeho towarstwa (SŠT), Katharina Jurkowa, člonka předsydstwa SŠT Diana Wowčerjowa, kotraž je zdobom direktorka serbskeje wyšeje šule w Radworju a županka župy „Michał Hórnik“ Kamjenc, Beata Brězanowa jako nawodnica Rěčneho centruma Witaj a koordinator za serbske naležnosće w Budyskej wotnožce Krajneho zarjada za šulu a kubłanje, Bosćij Handrik.

Kaž Suchec-Dźisławkowa na naprašowanje Serbskich Nowin zdžěli, so w dnjo-

wym porjedže za zetkanje serbskeho kubłanskeho koła zapřichodny tydzień zwjazk serbskich šulow jako tema jewi. Potom chcedža so na to dojednać, hdy a kak budu so z wjesnjanostami a nawodami šulow wo tym rozmołwjeć. Nošerjo šulow, přewažnje gmejny, wšak na koncu rozsudža. To běše tež delegatam hlowneju zhromadźiznow wědome, kotřiž ani zwuraznili njesu, hač měł tajki „zwjazk“ skerje ideelneho abo tola strukturelneho razu być.

Z wida kubłanskeje referentki dže předewšěm wo to, konkretne wužadanja zhromadnje zmištrować. Na příklad nima Chrósćan šula hižo direktora, w Pančicach budže po wulkich prózdninach na čole zakładneje šule tohorunja wakanca, jeli so njeporadži, pragmatiske personelne rozrisanje namakać. A štó docyła by do syće zwjazka serbskich šulow słušał?

Tuchwilu jewja so štyri sfery serbskeho kubłanja w zjawnym šulstwje. Na jednym boku su to kubłanišća Pančicy-Ku-

kow, Chrósćicy, Worklecy a Ralbicy, kotraž reprezentuja hladajo na wšědný dzeń naložowanu rěč „jadrowu kónčinu“. Na serbskich šulach w Radworju a Budyšinje je situacija podobna, posudžuje Suchec-Dźisławkowa. Dalše šule z 2plusrjadownjemi mamy we Wojerecach, Kulowje a Slepom; a zabyć njesměli na šule, hdžež serbsčinu jako cuzu rěč wuwučuja.

Suchec-Dźisławkowa sej „pool wučerjow serbsčiny na druhich šulach“ přeje, zo njeby – kaž w Njeswaćidle – serbsčina wupadnyła, dokelž je serbsčinarčka nardawka jako rjadowniska wučerka přewažac dyrbjała. „Chiba móhli w přichodze samo serbske a ‚němske‘ šule na polu serbsčinarjow kooperować“, kubłanska referentka přemysluje. Na kóždy pad trěbne je „zwyšenje statusa serbsčiny, zo njeby so tuta na němskich šulach přeco jako přenje ‚preč racionalizowała“, tak Suchec-Dźisławkowa. Wšako je skrućenje serbskosće tema, kotraž wšelake šule we Łužicy přesahuje.